



徽縣志卷之八

藝文志上

郡縣之志藝文必多採漢魏唐宋之作畧於近代  
斯爲體裁之善而正不然也夫志爲斯地志也文  
固有關於斯地則其人其言其事皆不可磨滅摩  
崖劍閣豈必以世遠而傳舊志錄前代記文無關  
斯地重輕今就宋唐以前碑碣所存墳籍所載廣  
爲搜輯合以近時名公著述炳炳烺烺已覺蔚然



大觀惟秦隴尙武絕少文人何幸李杜寓賢歌行  
噲炙人口近如佩青學士居然

盛世羽儀屹雅揚風不尤爲藝林翹楚耶志藝文第

八

綸音

宋順帝封楊文度詔

時文宏伐仇池  
破戍兵於蘭臯

昇明元年詔曰茂賞有章實昭國度酌庸斯炳載宣

史冊督北秦州諸軍事武都王楊文度門承輝寵世

榮邊邑忠果既亮才勁兼彰龍驤將軍楊文宏肅協  
成規躬提桴鼓甲稜百頃席卷蘭臯功烈之美竝足  
嘉嘆以酬勲緒

宋太祖褒贈姜道盛詔

元嘉二十年詔曰故晉太守姜道盛前討仇池志輸

誠力卽戎著效臨陣能清

劉真道裴方明並坐破仇池割斷金銀諸雜寶貨又

藏楊難當善馬下獄死故及之

近先登濁水殞身鋒鏑誠節俱亮矜

悼於懷

宋太祖褒郭啓予詔

元嘉二十八年詔曰故綏遠將軍晉壽太守郭啓予  
銜命虜庭秉意不屈受任白水奉公靡懈私餽纖毫  
弗納布衣蔬食飭躬惟儉故超受顯邦以甄廉績而  
介誠苦節終始匪貳身死之日妻子凍餒志操殊俗  
良可哀悼

金章宗賜承裕詔

詔承裕曰昔汝自言得兵三萬足以辦事今以石抹



仲溫木虎高琪青宜可與汝軍相合計可六萬斯亦  
足以辦矣仲溫高琪兵道險阻汝兵道甚易也自秦  
州至仙人關纔四百里耳從長計畫以副朕意

元文宗賜廣慧國師像贊

振迹於蜀道浴於涼翠蓋有煒朱服斯煌孰友孰師  
維公維王邁往之氣粹於眉宇奚居而默奚道而處  
不二之門其誰與語

明成祖贈張三丰制

制曰朕惟仙風道骨得天地之真元秘典靈文集陰  
陽之正氣顧習長生久視之術而成超凡入聖之功  
曠世一逢竒蹤罕見爾真仙張三丰芳姿穎異雅志  
孤高存想精專煉修堅定得仙籙之寶訣餌金鼎之  
靈膏是以名隸丹臺神遊元圃去來倏忽豈但烟霞  
之棲隱顯渺茫實同造化之妙茲特贈爾爲通微顯  
化真人錫之誥命用示褒崇於戲蛻形不老永爲物  
外之逍遙挹道紀倫益動寰中之景慕尙期指要以

惠來英

傳

虞詡平武都寇傳

漢

班固

羌寇武都鄧太后以詡有將帥之畧遷武都太守引  
見嘉德殿厚加賞賜羌乃率衆數千遮詡於陳倉谷  
詡卽停車不進而宣言上書請兵須到當發羌聞之  
乃分鈔傍縣詡因其兵散日夜進道兼行百餘里令  
吏士各作兩竈日增倍之羌不敢逼或問曰孫臏減



竈而君增之兵法日不過三十里以戒不虞而今日  
且二百里何也詡曰虜衆多吾兵少徐行則易爲所  
及速進則彼所不測虜見吾竈日增必謂郡兵來迎  
衆多行速必憚追我孫臏見弱吾今示強勢有不同  
故也旣到郡兵不滿三千而羗衆萬餘攻圍赤亭數  
十日詡乃令軍中強弩勿發而潛發小弩羗以爲矢  
力弱不能至并兵急攻詡於是使二十強弩共射一  
人發無不中羗大震退詡因出城奮擊多所殺傷明

日悉陳其兵衆令從東郭門出西郭門入貿易衣服  
日轉數周羗不知其數更相恐動詡計賊當退乃潛  
遣五百餘人於淺水設伏候其走路虜果大奔因掩  
擊大破之斬獲甚衆賊由是敗散南入益州詡乃占  
相地勢築營壁二百八十所招還流亡假賑貧人郡  
遂以安先是運道艱險舟車不通驢馬負載僦五致  
一詡乃自將吏士按行川谷由沮至下辯數十里皆  
燒石剪木開漕船道以人僦直雇借傭者於是水運

通利歲省四十餘萬始到郡戶纔盈萬及綏聚荒餘  
招還流散二三年間增至四萬餘戶鹽米豐賤十倍  
於前坐法免

表疏

來歙自書表

漢班固

歙與蓋延馬成進攻公孫述王元環安於河池下辯

陷之乘勝遂進蜀人大懼使刺客刺歙未殊

加刃歙身棄之

而馳召蓋延延見歙因伏悲鳴不能仰視歙叱延曰



虎牙何敢然今使者中刺客無以報國故呼巨卿欲  
相屬以軍事而反效兒女子啼泣乎刃雖在身不能  
勒兵斬公耶延收淚強起受所戒歛自書表曰臣夜  
人定後爲何人所賊傷中臣要害臣不敢自惜臣奉  
職不稱以爲朝廷羞夫理國以得賢爲本大中大夫  
段襄骨鯁可任願陛下裁察又臣兄弟不肖終恐被  
罪陛下哀憐數使教督投筆抽刃而絕帝聞大驚省  
書覽涕

鑄鐵錢疏

宋馬景夷

徽宗嗣位通判鳳州馬景夷言陝西自去年罷使銅錢續遣官措置錢法未聞有深究錢弊輕重灼見利害者銅錢流注天下雖千百年未嘗有輕重之患獨鐵錢局一格所可通交易有無者限以十州之地欲無滯礙安可得乎又諸州錢監鼓鑄不已歲月增多以鼓鑄無窮之錢而供流注有限之用更積十年積滯一隅暴如山邱公私爲害又倍於今日矣卽宜弛

其禁界許通隣近諸路特不入京城外此解鹽地州  
縣竝許通行折運鐵錢如此則流注無窮久遠自無  
輕重之患

論

蜀口形勝論

中興四  
朝志錄

大散關隸梁泉縣在鳳翔府寶雞縣之南爲秦蜀往  
來要道兩山關控斗絕出可以攻入可以守實表裏  
之形勢也和尙原鳳之東境抵鳳翔不百里仙人關



興之東境距利州纔七駟自利抵劍閣百里而羸倘  
棄和尚原而退守仙人關則蜀之險要所失過半敵  
得和尚原或自梁洋經米倉山入巴閬或自均房由  
達州山路入夔峽或直攻仙人關勢分形散所脩皆  
急一處破壞則在處震動矣紹興間敵攻仙人關而  
不能留者以糧不濟耳若使其治廢邑聚散民耕屯  
其間則得吾地而可守入吾境而可留矣自南北講  
好中分關中之界如大散仙人饒風武休皆我朝之

界也而仙人關外又分左右兩道自成州經天水縣  
出皂郊堡直抵秦州昔吳璘大軍從此而出地勢平  
衍因爲壕塹引水縱橫名曰地網以遏敵衝自兩當  
縣直出鳳州取大散關距和尚原纔咫尺敵嘗憑原  
下視如蟻蛭故其勢難守所恃緩急有仙人關耳

書

荊州刺史豫章王嶷與楊廣香書

夫廢興無謬逆順有恒古今共貫賢愚同察梁州刺

史范柏年懷扶詭態首鼠兩端旣已被伐盤桓稽命  
遂潛遣李烏奴叛楊文宏扇誘邊疆荒襍柏年今已  
梟禽烏奴頻被催破計其餘燼行自消夷今遣參軍  
行晉壽太守王道寶等領兵會於南鄭或汎舟墊江  
或飛旂劒道腹背颺騰表裏震擊文宏容納叛戾專  
爲淵藪外侮皇威內凌國族君奕世忠欵深識理順  
想卽起義應接大軍共爲犄角討滅烏奴尅建勤忠  
茂立誠節沈攸之資十年之積權百族之衆師出境